



鼓山志序

古今之為志者遷固其選矣他如博物述異祇以炫奇夷堅虞初徒資談噱然猶古之遺也晚近有作匪考之弗實則語焉弗詳甚至附會蕪雜荒唐謬悠吾無取焉鼓山舊無總志雖遊蹤不絕奈文獻無徵失今不圖後將何述友人謝在杭夙嗜司馬之遊雅擅三長之譽宅憂之暇爰與朋儕東窺芳巖徧尋古蹟披荆棘闢草萊剔苔蘚凡危峰秀巒靡弗歷靈巖竅洞靡弗探



鐫石留題靡弗錄古碣殘碑靡弗辨嘉木奇石
園圃土田委徑故道精廬佛刹神區仙跡緇錫
源委靡勿窮治其始而究其終積日累月編次
成書務俾幽隱畢達高深咸晰煙霞生色猿鶴
揚聲是故首之以勝蹟而靈異昭矣次之以建
置而規制備矣又次田賦而供需賴矣物產志
則名區之生息以章沙門志則衣鉢之相承有
緒貞珉志則歷覽之人代有稽藝文志則今昔
之詠題弗泯至于叢談亦並載罔遺則騷逸之

塵柄弗竭洵名山之信史資千古之考鏡斯志
不與茲山相為無窮者乎予惟曩昔三陟山巔
晚歲病疲實同宗炳睇此瑤編神情飛動不謂
鄙語亦荷兼收弁以蕪辭逾滋汗頰縱在杭不
我吐棄得無貽笑山靈乎萬曆戊申歲冬十一
月既望前進士郡人趙世顯撰

鼓山志目錄

卷之一

勝蹟志

卷之二

建置志

卷之三

田賦志

卷之四

物產志

卷之五

沙門志

卷之六

貞珉志

卷之七

藝文志一

卷之八

藝文志二

卷之九

藝文志三

卷之十

藝文志四

卷之十一

藝文志五

卷之十二

叢談志

鼓山志卷之一

郡人謝肇淛脩葺

徐 燝參訂

勝蹟志

峰巒

巖洞

水石

園林

自有宇宙便有此山泊祇林肇闢榛莽漸開
幽巘竒跡歷歷可指然皆杖屨所及強爲之
名耳不能名者不能志也作勝蹟志

鼓山志 卷一
峰巒

鼓山距郡城東三十里屹立海濱高可十五里
延袤數十里郡之鎮山也名勝志云山巔有
巨石如鼓或云每風雨大作其中簸蕩有聲
故名郭璞遷城記云右旗左鼓全闕二絕山
有雲氣則天必雨諺云鼓山帶帽三日泥道
謂地泥濘也

劣崩峰一名大頂山最高處狀若覆釜其頂常
為雲氣所籠必天氣清朗始可登眺南望雙
江如帶環遶隔江諸山如象奔虎踞皆止於
江干西望郡城若圖畫遠近村落若聚米若
布棋北望萬山爭奇競峭若擁而立其後東
望大海一氣茫然螺髻數點隱見煙波中相
傳謂大小琉球云

白雲峰一名小頂在大頂峰下當寺之背西南
望與大頂等平地有竇泉湧出
獅子峰在寺之西為小頂右支形若獅子踞地
故名山逕險窄怪石棋布

鉢孟峰在獅子峰之東頂微凹若覆孟故名下有石卓立如圭刊高山仰止四字有石方廣三丈名羅漢臺

香爐峰在鉢孟峰之東為寺前案前即觀化亭三塔在焉

東峰在鉢孟峰前上山路經其旁

卓錫峰在東峰左奇峰卓立

鼓碕崗在卓錫峰前下臨鼓碕崗

獅眠崗在山南麓解院之左普度寺之上

半月崗在獅眠崗右古讖云半月山下出繡女牛眠崗在解院右全體皆石鑿數百級而登兩傍皆古樹根盤石隙

乘雲嶺在東峰下上山大路由東際橋至嶺一里許有山泉瀰漫石面

簫灣嶺在鼓碕崗左

蓬碕嶺在簫灣嶺左山石重疊

巖洞

靈源洞在寺之左為大頂左支巖竇巖怪下石

磴六十餘級中忽開朗兩旁皆石壁中裂一
澗深可三丈有似於洞故名

海音洞在鳳池右歷數峰始達洞口可坐四席
其中深不可測相傳有羽流居此時聞海濤
之音以為通於海云

白雲洞在海音洞下嶮巖峻峭巨石棋布萬曆
丙戌僧悟宗始闢名勝志云自黃坑而登磴
級斬然如升梯峭壁懸崖兩石對峙如門者
山下二門稍寬最上為一天門僅容側肩自

此又歷石磴七百二十級至一坪又百武始
至洞奇巖劃開深丈許廣逾五丈倚巖為屋
石天為蓋白雲混入咫尺莫辨當霽時郡城
煙火通若眉睫

桃巖洞在山西南麓深丈許廣二丈以幽寂勝
洞前有田圃可耕種

達摩洞在獅子峰上洞中有泉甘寒可飲

蛇洞在蓬碕嶺空濛屈曲莫知所止

喝水巖在靈源洞下五代時僧神晏誦經於此

惡水聲喧聒因叱之水乃逆流於東澗西澗
遂涸

國師巖在西澗底東壁深廣各十餘尺晏師既
以神力涸其澗水遂移居於此嘗掇石乳而
食指痕猶存後閩主加晏號興國師因以名
其巖

華嚴巖在湧泉寺內唐建中間僧靈嶠誦華嚴
經於此故名

忘歸巖在白雲峰下

懸鐘巖在蕭灣嶺上郡人郭波書

雲屏巖在白雲洞前

佛頭巖在海音洞傍

虎窟在圓通閣左宋以前多虎

水石

石竈在湧泉寺前相傳靈嶠初入山時爨於此
前有石池僅容斗水盛夏不竭

將軍石在靈源洞道側峙立若甲卒

仙跡石在將軍石下石上有指痕四

合珪石在半山亭上雙石對合若珪焉

金剛石在白雲洞印月潭上

雞頭石在靈源洞中一峰獨聳旁垂如俛啄狀
貓縋石在小頂峰下狀如鐵貓

劍石在蓬崎嶺其石如劍

三天門在積翠庵之上由此以達白雲洞萬曆

甲午僧悟宗闢

白猿峽在石門之右舊有白猿居之故名

浴鳳池在大頂峰之比廣百餘畝三面皆山南

關爲門遠眺方山及浯溪諸水唐末有樵者
見五色雀群浴於此故名今靈源洞鑄鳳池
山俗遂以水雲亭爲鳳尾亭誤矣

湧泉在羅漢閣前亦名羅漢泉元延祐乙卯僧
妙有作水障

龍頭泉在石門之右卽西澗逆流於此甘冽爲
一山之冠

乘雲泉在乘雲亭後其味亞於龍頭

神泉在大頂峰萬曆初相傳可以愈疾赴者雲

集居民至開邸舍其下乂之乃息然郡邑禱
雨猶赴此請水云

吼雷湫在白雲洞龍脊之上有水轟激如雷
印月潭在吼雷湫之前

園林

西畬在湧泉寺之右宋紹聖間僧潛洞開闢種
茶

茶園一名舍利窟語訛爲笊籬窟在湧泉寺之
左僧席盛時道人不守戒者謫居於此使

之種茶以供香積今居民二十餘家皆其子
孫猶以種茶爲業云

董坑在西畬之下紹聖間僧潛洞種松百餘株
於此

荔林在東際亭之上

硯池園在解院之前

論曰吾閩巖壑甲天下而劣崩其最近且
著者王敬美謂靈源之外無奇然登大頂
望海島茫茫日月吐吞奇何必在我也至

於白雲洞幽險恠絕歷千餘年而始開則
吾志之不足盡山有如此洞矣

鼓山志卷之一終

鼓山志卷之二

郡人謝肇淛脩葺

徐 燝參訂

建置志

寺院

庵堂

殿閣

齋寮

亭臺

池橋

祠廟

屋宅

丘墓

樓附

門庫坊附

室軒附

塔井附

五宗旣衍閩遂布金鼓山巖壑香阜攢羅今
卽不盡存其趾足徵也余睹其存不忘其廢
廢興相遞世代因之矣作建置志

寺院

湧泉寺在山之半其初爲潭毒龍居焉每興雲
雨損人禾稼唐建中四年從事裴胄請僧靈
嶠誦華嚴經於潭傍之巖龍遂去不爲害因
建華嚴寺于下會昌中鞠爲藜莽七十餘年
梁開平二年閩忠懿王審知填其潭爲寺因

名湧泉寺宋乾佑五年改名鼓山白雲峰湧
泉院 國朝復改爲寺宋紹興己卯秋暴雨
自小頂峰發洪衝突方丈法堂西菴皆崩是
年住持僧宗建重建 國朝宣德間復建弘
治辛亥爲野燒所焚癸丑四月僧德丰請于
鎮守太監陳道捨資重建嘉靖壬寅二月夜
野火遙從大樹孔中發壓寺寺盡燬或云唐
時龍起靈源洞然洞之西澗具在卽神晏未
喝亦非有不測之淵可容其蟠螿而寺之趾

至今傳杖其中猶有濕壤則寺之趾爲潭其說信然

白雲廨院本湧泉寺積穀處與寺同建宋治平間住持僧德藻創闢禾場元豐間僧顯宗增置倉庾紹興己卯暴雨溪漲東廊及客省堂皆爲漂沒是年住持僧宗建重建政和辛卯八月燬住持僧體淳重建十年始成宣和癸卯八月又燬本僧又建至正間又燬僧崇祖又建國朝宣德間爲水崩圯隨卽脩葺山

門佛殿廊房香積莊嚴壯麗倍于昔時云今人遂指爲鼓山寺郡志亦因之誤也

南院一名新榭庵在舍利窟之前宋開禧四年芥菴慧意禪師建

南山塔院洪武庚申僧正玉建

方丈庫院政和二年僧體淳建

浴院嘉定己巳僧行謙建

普度寺一名普度塔院在眠狗崗元大德甲辰道傑禪師建今廢爲丘隴

衡山寺在山之東

庵堂

圓通庵本圓通閣在東峰宋慶元間祖鑑大師
建 國朝宣德間重建爲庵俗呼茶亭萬曆
丙申邑人徐燧捐貲脩葺

老禪庵在廨院之右

靜觀庵在廨院西

靈源庵在喝水巖倚石而剏萬曆初蜀僧寶珠
建額曰靈巖

一多庵在湧泉寺之左宣和間僧體淳建

癡坐庵在湧泉寺後宣和間僧體淳建

平楚庵在半山亭之前坑

耆義庵在平楚庵傍

崇石庵在香爐峰下四面皆石宣和間僧體淳
建

白雲庵在廨院左

雲翠庵在白雲庵傍

南庵在半山之別麓住僧茶毗者多瘞於此有

歷代塔甚多寶祐丙辰僧達真增置東西二塔後葬於東塔焉

泉石庵在廨院右

南院塔庵在半山至元十九年僧明鏡建後葬於此

雙澗塔庵在半山至元二十三年僧光聳建後葬於此

東際庵在東際亭之傍宣和間僧體淳建興善庵在半山永樂間詩僧法闡建以居

積翠庵在白雲洞下萬曆間僧悟宗建

元真庵在白雲洞下萬曆間都司許國威建東庵在湧泉寺東

西庵在其西俱紹興間僧士珪建

三塔庵洪武己巳僧宗繁建

雲際庵在廨院之左

蟄仙庵在鼓山之麓白玉蟾嘗遊於此有記選佛堂在湧泉寺右延祐間僧如山建

恢張堂在選佛堂之右靖康九年僧士珪建

觀禊堂在蹴鰲橋傍靖康九年僧士珪建

照堂淳熙十年僧德最建

客省堂在廨院左

地藏堂紹興丙子僧宗建建

老宿堂在湧泉寺左靖康十一年僧士珪建

東峰堂在湧泉寺右至正十二年僧崇祖建

獨照堂在湧泉寺右與老宿堂同建皆以居老

病之僧

負春堂在獨照堂後靖康十一年僧士珪建以

憇勞役侍者

海月堂在湧泉寺成化戊戌年僧道恂建

殿閣 樓附

國師殿在湧泉寺法堂左天聖二年住持賜紫

衣僧常恪建紹興十四年僧宗演重建咸淳

間僧正凝拓建

祖師殿未樂三年僧了心建

觀音殿在湧泉寺右至治間僧崇寶建至元十

五年僧道傑重建

報慈佛殿至元甲辰僧道傑建

羅漢閣在湧泉寺前乾興元年僧如或建淳熙六年僧德最重建紹興四年僧士珪移于山門之上

華嚴閣在方丈東紹聖間圓覺大師建政和二年僧體淳重建

九層閣在湧泉寺後靖康九年僧士珪建

毗盧閣在湧泉寺右嘉定丙子年僧行謙重建千佛閣在湧泉寺右永樂間僧了心建

飛錫閣在浴鳳池咸淳丁卯僧正凝建永樂間僧文宥重建

超凡閣在湧泉寺內至元間僧道傑重建白玉蟾有詩

華嚴樓紹聖甲戌僧潛洞建

妙峰樓在湧泉寺左宣和間僧體淳建

齋寮室軒附

頰伸齋在湧泉寺左宣和間僧體淳建

首座寮在湧泉寺右淳熙十年僧德最建

維那寮在湧泉寺右淳熙十年僧德最建

前資寮在維那寮前靖康八年僧士珪建洪武

己巳宗繁重建

且過寮在湧泉寺山門之左靖康八年僧士珪
建

湧泉寮在華嚴巖下靖康七年僧士珪建

白雲寮在浴鳳池紹興八年僧士珪建嘉熙丙
午孤禪鏡和尚重建

五老寮在浴鳳池至正十三年僧崇祖建

老宿寮洪武庚申僧正玉建

憨睡室在頻伸齋後宣和間僧體淳建

遁室在浴鳳池 國朝成化初崇古大師建

無寄軒在湧泉寺右宣和間僧體淳建

不動軒在湧泉寺

自牧軒景泰辛未僧無隱建

亭臺 門庫坊附

臨滄亭在大頂峰東向以鐵爲瓦元統間僧如

山建

石門亭在靈源洞至元甲辰僧道傑建
望州亭在半山西向宋時建年月未詳

天風海濤亭在大頂峰宋淳熙間僧德最建元
統間僧如山重建永樂三年了心又重建天
順甲申僧祖達重脩

水雲亭在靈源洞盡處宋時建年月未詳今俗
呼爲鳳尾亭

湧泉亭延祐乙卯僧妙有建天順甲申僧祖達
重脩

松關亭在靈源洞元至治間雪巖禪師建
觀化亭在湧泉寺前
後樂亭在觀化亭下

普賢亭在湧泉寺至元間道傑禪師建
境界亭在湧泉寺與普賢亭同建

乘雲亭在圓通庵之下 國初靈武王翰鑄乘
雲二字於石壁正統間無隱禪師建亭於其
下

半山亭一名合珪亭嘉熙甲辰僧自鏡建 國

朝隆慶間重建萬曆辛卯重葺

梯雲亭在乘雲亭之下嘉熙間孤禪鏡和尚建
海會塔亭政和三年僧體淳建

圓通亭在圓通庵前洪武庚申僧正玉建萬曆
丙申邑人徐燭重脩

東際亭在解院外亭下爲橋紹興辛巳僧宗建
建隆慶壬申僧明遠重葺

通霄亭在解院山門前取神晏他家自有通霄
路之語嘉熙間孤禪鏡和尚建

白雲亭景泰辛未僧祖達建

元公亭宋嘉祐間郡守元絳建郡人因以爲名
元公詩云誰書吾姓揭亭顏是也

應真臺在湧泉寺元統間僧如山建

涅槃臺在湧泉寺紹聖甲戌僧潛洞建

說法臺在白雲洞前萬曆丙戌僧悟宗闢

無盡門在湧泉寺宣和間僧體淳建

長生庫在湧泉寺嘉熙戊戌僧自鏡建

茶庫在湧泉寺嘉熙戊戌僧自鏡與長生庫同

時建

磨坊在山下三里許紹興十三年僧宗濱建

池橋 塔井附

放生池在湧泉寺方圍八十餘丈建炎末僧宗濱開

化龍池在解院法堂之前泰定丁卯仲春造

東際橋在解院之左紹興辛巳僧宗建建

蹴鼈橋在湧泉寺前

羅漢橋在湧泉寺前水經其下爲羅漢泉

圮橋在黃石祠之前

化龍橋在白雲洞下僧悟宗建

南院東西二塔寶祐間僧達真建

山中不止二塔然非有高

標跨於蒼穹者不錄

羅漢井在湧泉寺前宋嘉祐二年僧惟善鑿

水滴井在東際橋之傍

祠廟

閩王祠在湧泉禪院祀忠懿王審知宋元祐三年僧顯宗建王廊有記咸淳丁卯僧正凝重

建至正戊午僧宗枝重脩葺

黃石祠在牛眠崗宋熙寧間有黃石公香爐飛落樹上一道人識之或云自穀城或云自興化涵頭遂建祠事見叢譚

屋宅

唐黃璞宅在鼓山之陽璞遠祖太和於鼓山得道遺跡猶存乾寧中翁承贊贈璞詩云烟蘿况逼神仙窟丹竈還應許獨尋

五代陳貺宅貺結茅于石門巖種芋菜筍以爲糧人有餽以米者必答以芋筍相當然後受居四五年去廬山隱焉

宋張翬宅在鼓山下磻源翬字柔直懷安人政和間進士官至秘閣脩撰事見郡志

明林謹夫宅在鼓山下磻源謹夫舉成化甲辰進士官徽州同知有文名

明黃用中宅在鼓山下用中字通理能詩文

丘墓

宋蔡蒙叟墓在鼓山下蒙叟博通古今薦授本

鼓山志 卷二
州助教卒年八十餘著繩子三卷行于世見
郡志

明黃源大墓在鼓山黃使山源大官遂昌知縣
詳見郡志

明郭麟墓在蕭灣麟官新化知縣

明林恕墓在浴鳳池之右恕官雲南按察使有
詩名詳見長樂縣志

明陳柯墓在鼓山里眠狗崗柯官江西參政所
葬卽普度寺故址

明洪世文墓在鼓山蕭灣世文官山東副使從
祀鄉賢

明黃宗器墓在鼓山梅徑之麓宗器官湖廣副
使

論曰寺之興廢山與俱存亡焉是山也事
莫神於晏師而教莫盛於趙宋自祝融煽
虐寶刹爲灰且七十載矣屯極而通天道
也如曰小人何知享其利者爲有德君其
問諸湧泉

鼓山志卷之二終

鼓山志卷之三

郡人謝肇淛脩葺

徐 焞參訂

田賦志

震旦叢林食常千衆檀那長者施田飯僧惟
恐其不及也鼓山自興聖國師歷數百禩香
積無闕今且僧日貧寺日廢名勝漸以漸滅
此其故難言之矣作田賦志

五代田數無考宋田一萬三千畝治平間住持

僧德蓀開田於大目莊界元豐間任持僧德宗開田於王坑紹聖末永康洲田湖洲田皆爲洪水衝崩任持僧潛洞修復宣和初任持僧有需開田於大洲政和間任持僧體淳修復下尾洲及永康洲田紹興間任持僧士珪置新安永安二洲田修復石鰲永康阮洋諸洲田乾道癸巳任持僧道升修復保安洲田先時寺田額爲勢家所侵至是遣弟子本妙詣行在所陳理歷二寒暑始白田仍歸寺淳

熙間任持僧守愚修復保安洲田嘉熙間任持僧自鏡開闢保安洲田淳祐間任持僧宗信復齊四娘洲田寶祐五年任持僧普門修復平湖及石鰲二洲田咸淳初大洲南面又爲豪右李提閑所侵任持僧法琪訟而復之咸淳六年任持僧正凝復牛眠崗及平湖洄湫洲田元至元十八年任持僧佛鑑復保安洲及平湖洲至元末任持僧光聳增螺洲田延祐丙寅任持僧至鏗增田一百畝以充諸

殿堂長明徹夜燈元統末住持僧如山復懷
安縣田一千九百畝又於寺大洲之南插竹
堰水得洲地數頃 國朝田仍舊額洪武癸
亥住持僧師景作魚鱗圖以識各庄田業洪
武甲戌住持僧正玉置邵岐田宣德末慶安
洲田爲閩帥府侵住持僧文宥白布政司復
之正統間住持僧無隱增惠安洲田天順甲
申齊年新樓下眉田爲豪右所侵住持僧祖
達訟復之成化初惠安下湄二洲田爲豪右

所侵住持僧德鑑訟復之次年募衆扞挿永
康慶安二洲湄以補陷江今泡洲等處是也
弘治己酉桐口新洲田一千餘畝爲鄉民告
補魚埕秋糧住持僧道恂訴於 朝給還一
百九畝弘治辛亥暴雨驟至寺前田皆爲沙
壅明年住持僧惠欽開墾如舊嘉靖初寺僧
尚數千指二十七年勢豪奪其大洲田二千
五百畝住持僧訟之累年不決乃以田入儒
學於是僧衆稍稍散去而解京黃冊猶屬鼓

山寺舊管也既而奉 朝旨四六寺田四供

香燈六徵其租餉軍租畝銀六分萬曆丁酉
年巡撫金公復用軍興以其八餉軍又倍徵
其租於是僧益困寺田幾盡歸豪家矣三十
五年住持僧性聰訴於都御史臺及監司下
邑大夫王君世德窮治之因得復其什一給
券存寺覬覦稍息詳見葉相公復田碑中

本寺前大洲田共一千五百一十三畝 幫庄
泡洲趙連秋庵等處共田二千二百一十畝

今皆爲洪水崩盡 姚下洋鐸庵洲江心洲

金墩洋共六百三十畝 黃石後一十四畝

閩縣光德里三圖齊四娘田二百九十九畝

大安大洽共六十九畝 光德里五圖惠安

洲田一百六十五畝又一十一畝 永北里

牛坑一百一十三畝 開化里齊年田一百

六十一畝又九畝 石鰲田二百一十三畝

鳳山田一十六畝 邵岐田一十七畝 下

四洲田五百八十一畝 時昇里堵橋田一

十四畝 官賢里白湖田二十六畝 歸仁
里石舖田四十五畝 還珠里橘山田一十
一畝 靈壽里大義田五十九畝 歸善里
黃坂田一百四十九畝 崇賢里康山田二
百零七畝 潘墩田八十四畝 豐沙田一
百零一畝 高惠里十九娘田七畝 上黃
後洽田一十七畝 光俗里三十二畝 鼓
山里末康洲田二百二十一畝 山兜田一
百一十三畝 大岸田八十七畝 埔頭田

二百一十九畝 洋下田三十九畝 慶安
酬勞田四十四畝 新劉都文田三十七畝
遠洋田五百五十一畝 洲仔田七十一畝
上洋田一百二十九畝 埔東田一百三十
畝 香燈田三十二畝 分收田八十七畝
洋裏田一百七十三畝 蕭灣田三百五十
畝 竹嶼橫嶼章林秀嶺田共三十四畝
候官縣螺埔口田一千畝
懷安縣桐口庄田一千五百畝

長樂縣靈山嶺田三百五十畝

本寺南園一十五畝 荒地六十畝 山田三

十畝

本寺山五代無考宋山稅舊產錢一十五貫七
百三十文新產錢三十二貫五百九十八文
縣申一十四貫二百二文元無考 國朝山
界上至蕉坑下至牛坑共八百三十八畝

論曰余讀田賦志蓋愴然悲心焉寺之荆
也千乘之主傾國貲給之而其衰也閭里

右姓攘其餬口夫捨貲者惑也攘貲者亦
惑也捨者徼福惑在未來攘者俛德惑在
見在然而一予一斂夷蹠判矣先輩林文
恪志郡事至鼓山曰山寺雖存僧貧無田
以居其徒逃於四方客至遊者但見重門
不扃荒徑莫剪疇昔勝概咸爲之歎息云
嗚呼布金檀越護法宰官時而三復斯言
也山靈之幸也

鼓山志卷之三終



